

## Pe muart di Fausto Schiavi

Al sarès plui che naturâl di front ae muart, che al è in fonts il silenzi di chest mont, al sarès plui che naturâl tasê, parcè che al samee che di front ae muart nol sedi nuie di dî, se no dome tasê. Però, ancje se al è il silenzi, o scugnî di alc di front a la muart, parcè che il sens de nestre vite al è cence sens se no rivin adore se no di capî, almancul di crodi alc a proposit de muart.

L'om no si podarà mai capîlu se non si capîs ancje l'at plui grant de sô vite dopo de nassite, che al è chel di murî. E jo o pensi che une robe dal gjenar nus svicini tremendementri a Diu. L'om che al mûr, la muart in fonts, al è come che al è Diu par nô. Diu par nô al è il silenzi, e cuant che o crodin di vèlu in cualchi maniere capî, no, al è plui in là. Cussì un pôc ancje l'om. L'om nissun al rive adore di capîlu, al è simpri plui in là, al è simpri plui in là fintremai cuant che, murint, al finîs tal silenzi di Diu. Par chest, il muart no nus dîs plui nuie, no nus mostre la sô muse, no nus fâs sintî la sô peraule, al semee che si dismentei di nô come Diu che al tâs simpri.

Però, par rivâ adore di crodi che in chel silenzi (che al è il silenzi di Diu), e seti pardabon une altre vite, jo o crôt che la reson no zove. La reson ti puarte fintremai cuant che e rive la muart. O starès par dî cuntune imagjin che la reson ti puarte fintremai cuant che al va a mont il soreli, ma no viôt lis stelis dal cîl.

O crôt che e sedi necessarie une sole robe: rivâ adore di crodi. No di crodi sierant i voi, ma di crodi a un che al vali la pene fidâsi di lui. Esatementri, il Cristianisim, cuant che al dîs che bisugne crodi, al dîs che si fidisi di un.

E crodêtmal, chi o devi dîlu, parcè che mal à dite Fausto no tancj dîs fa. Di front al colocui che si jere stabilît fra me e lui propit su la muart, mi à dite chestis frasis chi, che mi àn profondementri comovût e o crôt che e vali la pene dîlis ancje ai fedêi che a assistin al so funerâl.

"Jo te me vite - dissal - o ai vût ce dî un pôc di dut e di ducj, ancje de religjon. Di un sôl no ai vût ce dî: di Crist". Jo o riten che al sei un at di fede, di autentiche fede, parcè che la fede e je esatementri fidâsi di une persone.

\*\*\*\*\*

E o volarès zontâ une altre robe, parcè che mi semee di cjatâmi di front al esempi di une virtût cristiane che no si pratiche, e pazience che no si pratici, ma che al è di timp che no si fevele di jê. Une virtût une vore impuartante, chê de fuartece. Tradote in furlan o crôt che si devi dî: la virtût dal coragjo.

Al semee che si puedi jessi cristians cence vè coragjo. Forsit, capîmi ben, no vês di fâmi dî nuie di plui di ce che o stoi i disint. O crôt che si è cristians praticant lis virtûts cardinâls, lis virtûts fundamentâls. Une di chestis e je la fuartece. E sincerementri o crôt che ducj chei che lu àn svicinât in cualchi maniere a àn viodût une fuartece tal agjî, tal fâ, tal pensâ, une fuartece tal sufrî. E une fuartece che o volarès che Diu mi des la grazie di vêle, e us e auguri ancje a voaltris, di cjalâ in muse la muart cun serenitât, cun coragjo. Parcè che in fonts e je la nestre nemie, ma no je la piês nestre nemie.

\*\*\*

E une ultime robe o scuèn dî: e al è che un al è cristian cuant che al vûl ben al prossim. Però, il volê ben al prossim al subîs un pôc l'inflûs dal nestri temperament. Ognun di nô al vûl ben al prossim un pôc cul so temperament, cul so mût di jessi, cul so mût dî. Ore, o crôt di scugnî indicâ tal nestri fradi inte fede Fausto, un om che al à dât un esempi di amôr dal prossim parcè che al à amât (e o crôt che a sedin ducj dacuardi su chest) il nestri par popul intune maniere plene di oparis, e ancje, là che al coventave, di peraulis.

Un mût che e je une caritât. Diu si lu cjate dapardut. Cualchidun al va a cirîlu tal "terzo mondo" e cualchidun Lu cjate tal prin mont, tal secont mont, ta chei che a vivin come lui, tal so popul.

Chest al è stât l'amôr di Diu esprimût di Fausto, tal amôr dal prossim so.

\*\*\*

Jo no varès altri di dî. A saressin altris robis di dî, ma chi dal pulpit, fasint la cerimonie liturgjiche dal funerâl e celebrant la Messe, mi steve a cûr sincerementri di riclamâ trê robis. La prime: la fede in ce che e je, ce che al vûl di crodi che di là dal silenzi de muart e esist une vere vite e cheste vere vite si clame fidâsi di Crist; la seconde, une virtût che e va dismenteantsi: la fuartece, il coragjo; la tierce, il riclam al amôr di Diu. .

*Pontebe 25.01.72*